

Deporte Local

Grand Master Chaco Jose Cornelio a drenta Hall of Fame di Taekwondo

ORANJESTAD (AAN)--- Grand Master Chaco Jose Cornelio di Noord Taekwondo Center a haci su entrada den e Hall of Fame di Taekwondo na Merca.

Despues di 30 aña di ta den e mundo di Taekwondo na unda cu Grand Master Chaco Jose Cornelio a logra varios premionan rond mundo a haci cu e la logra drenta Hall of Fame y esaki tabata e cherry ariba e ijscream. Un logro asina pa drenta Hall of Fame no ta cay for di cielo.

Esaki ta un logro door di tur e añanan cu Grand Master Chaco Jose Cornelio tin den Taekwondo y su bon trabao di referee. Despues di e Olimpiada na aña 2012 a pone cu Grand Master Chaco Jose Cornelio a cuminsa haya hopi invitacion pa para referee na diferente campeonatonan di taya internacional. Manera cu Grand Master Chaco Jose Cornelio a yega Aruba diasabra, e mester a biaha pa Rusia pa e Accord Sport Games na unda cu tin 15 referee for

di rond mundo pa asina para referee.


Nos ta desea Grand Master

Chaco Jose Cornelio hopi exito y pabien pa su logro di Hall of Fame di Taekwondo

y tambe pa e sigui cu e bon trabao.



Endy Croes y Chipen Chirino a sali pa Cartagena pa e di 26th ISF Congress



ORANJESTAD (AAN)--- Diamars atardi dirigentenan di Aruba Softball Bond a sali pa Cartagena Colombia cual ciudad ta host e di 26 Congreso di ISF, esaki ta e actividad di mas grandi mundialmente di ISF unda presidentenan di 127 pais miembro rond mundo ta encontra pa tuma desicionnan grandi pa cu futuro di softball.

Durante e Congreso aki tin diferente comision ta wordo apunta door di presidente Don Poerter pa trata puntonan importante y finalmente presentanan na Congreso pa posibel aprobacion.

Endy Croes por ehempel a wordo nombra Vice Presidente di e comision cu ta trata candidatonan proponi pa Hall of Fame. Presidente di e comision aki ta Bob Lev-

eloff di New Zealand y secretario general Beng Choo Low di Malasia. Aki mester controla tur paisnan cu a propone candidatonan kendenan posiblemente lo por wordo induci na Hall of Fame y tuma decision final si nan ta cumpli cu tur rekisitonan di ISF. Endy Croes a wordo apunta tambe den comision Legislativo.

Chipen Chirino a wordo apunta den "Equipment Standards" hunto cu entre otro Miguel Acosta di Cuba. Lo revisa tur rekisito y si ta nesesario lo propone cambio na Congressia.

Den e congreso aki lo trata tur proposicionnan di cambio den "Rule Book" di ISF 2014-2017. Asina cu cambionan keda aproba pa final December e rule book aki lo

ta riba mercado. Julio Hellburg un bon amigo di Aruba a propone diferente cambio y adaptacion pa cu e rule book nobo. Cuater dia di trabao intensivo desde mainta te anochi ta na caminda.

Endy Croes a wordo nomina pa e posicion di Vice Presidente di ISF pa region di Caribe. Diabierna lo tin eleccion pa presidente di ISF y vice presidente di diferente continente.

Den 140 voto Aruba lo mester 71 pa por drenta Directiva ehecutivo di ISF cual sigur lo por ta un logro historico. ASB ta desea su presidente y vice presidente Endy Croes y Francisco Chipen Chirino tur clase di exito. Nos Arubianonan luciendo riba plataforma internacional mundialmente.